

# Jems

## Te launiu Jems e taataa

**Na hakataakoto hakamattua i roto te launiu nei:**

Na tattara kaamata *1.1*

Na tiputipu te hakattina *1.2—1.8*

Na tama mouraro ia ma na tama hai sileni *1.9—1.11*

TeAtua setatakore tetama ki haisara *1.12—1.18*

Hakallono na tattara TeAtua *1.19—1.27*

Se hakammaha na tama hai sileni *2.1—2.13*

Hakattina, tena kuppena *2.14—2.26*

Na tattara te tama te lotu *3.1—3.18*

Te tama te lotu i roto te maarama nei *4.1—5.6*

Na tattara hakaoti *5.7—5.20*

<sup>1</sup> Anau Jems, anau hetama hehekau TeAtua ia ma TeAriki Jisas Krai:

Anau e kou atu tetauareka anauraa ikootou na tama hakaatoa TeAtua tera ennoho ina kina hakaatoa i roto te maarama nei raa.

*Te hakatina ia ma te atamai*

<sup>2</sup> Aku taina, kootou kimannatu pera ma kootou e me kituttuulaoi te saaita kootou ettiri na hahaaite, <sup>3</sup> maitaname kootou e illoa pera ma na hakattina kootouraa eivi koi te saaita na hahaaite, tena ite hakaotiote kootou elavaa tettuummau. <sup>4</sup> Tena kootou ki hakamattonu no ttuummau kittae roo te hakaoti, ia kittonu tahi kiselavaa kootou telliha, tena namee hakaatoa kikaatoa i roto kootou. <sup>5</sup> Emeia kame hetama kootou seisi te atamai aia, tena akoe

kulotu ake TeAtua, tena Aia e me kikou atu, maitaname TeAtua e me ki hoki ake hakaraoi roo i na tama hakaatoa. <sup>6</sup> Emeia te saaita akoe e lotu, akoe ki hakatina, ia ki se mamaanatu tammaki hoki. Te tama e mamaanatu tammaki raa e ssau pera ma he peau i roto te moana tera e aania ria no haere tautari tematani. <sup>7</sup> <sup>8</sup> Kame akoe he tama peenei: he tama se iroa te hakatonu te hakataakoto akoe, ia he tama se iroa hea akoe e me kippena, tena akoe ki setoo te maanatu pera ma TeAriki e me kikou atu he tauareka ma akoe.

*Na tama mouraro ia ma na tama hai sileni*

<sup>9</sup> Na tama telotu e tuttuu haeo raa e tau te hihhia te saaita TeAtua e ssau laatou i aruna, <sup>10</sup> tena na tama telotu e tuttuulaoi raa e tau te hihhia te saaita TeAtua e tuku laatou no mouraro. Maitaname na tama e tuttuulaoi raa e me kimmate pera ma na kaute ia ma na veve vaa roto raa. <sup>11</sup> Telaaraa e hopo ake ma te vvela hai mahi aia raa no ttuni na veve raa, tena na kaute na veve raa ku maoha, tena te hakamanako na kaute raa ku sei koi. Ia e ssau hoki, na tama e tuttuulaoi raa e me kimmate te saaita laatou e tauhano te ppena hea laatou e ppena i na aho hakaatoa raa.

*Na hahaaite ia ma na tatakore*

<sup>12</sup> Na tama ettuu mmau i na hahaaite raa e me ki hakatapuria, maitaname te saaita laatou e hakassao itaha ma na hahaaite raa, na tama naa e me ki too te ora TeAtua ni tattara hakamaoni ake i na tama elaoi Aia raa pera ma ni tuhana laatou. <sup>13</sup> Kame taatou e tatakorehia i na hahaaite, taatou selavaa te tattara ma, "TeAtua e kou mai te hahaaite nei." Maitaname

na mee haeroaa selavaa te tatakore TeAtua, tena TeAtua Hokoia selavaa te tatakore te tama. <sup>14</sup> Emeia taatou e me ki tatakore ria kame taatou e oo no mmao, tena ku kapitia i na tiputipu haeroa tera taatou e hihhai raa. <sup>15</sup> Tena na tiputipu haeroa taatou raa e me ki kou mai na hai sara, tena na hai sara raa e me ki kou mai te mate te saaita na hai sara e hakamaatua te ora akoe.

<sup>16</sup> Aku taina ma aku soa laoiroo, anau e hihai ma kootou ki illoa hakamaoni te mee nei! <sup>17</sup> Na hoki taualleka hakaatoa ia ma na mee taualleka raa e oo mai ite vaelani; TeAtua e kou mai taatou na mee raa; Aia ko te Tama ni pena te maahina ite vaelani raa, tena Aia ko te Tama selavaa te hakatike te maahina raa ki pouri. <sup>18</sup> Ite hihai Aia, TeAtua ni mee taatou no ttipu peenei ma na tattara hakamaoni Aia raa, ma kittuu taatou imua na mee hakaatoa Aia ni pena raa.

### *Hakallono, tena kuppena*

<sup>19</sup> Aku taina ma aku soa laoiroo, mannatu te mee nei! Natama hakaatoa ki vave no hakallono, e meia ki se vave no tattara, ia ki se lloto vave hoki. <sup>20</sup> Maitaname te lloto taatou na tama raa se tokonaki ki ssau te tauareka TeAtua raa. <sup>21</sup> Ia tena peesia na tiputipu haeroa hakaatoa ia ma na hakataakoto sakkino raa itaha. Tauttari TeAtua, tena ku too na tattara Aia ni ttori i roto na hatu manava kootou raa, na tattara tera e lavaa te tokonaki kootou ki ora raa.

<sup>22</sup> Auu se hakalollono koi na tattara Aia raa; e meia tauhano te tautari na mee akoe ni hakarono raa. <sup>23</sup> Kame akoe e hakarono koi na tattara raa, tena ki se tautari na tattara raa, tena akoe e ssau pera ma na tama e matamata koi te tipu latou raa i roto te kalasi raa.

24 Na tama naa e lavaa te mmata no kkite na ttipu laatou raa iroto te kalasi, e meia te saaita laatou e oora, natama naa te saaita naa koi kussiri ma laatou ettipu peehee. <sup>25</sup> Emeia kame kootou e mmata hakaraoi roo tetuaa hakamaoni tera e mee na tama kittonu raa, tena kutuku na hakataakoto kootou raa i tetuaa raa, ia kise mee ma kootou kihakallono koi, tena ki oti kussiri, e meia tauttari noppena na mee taualleka raa. Te Atua e me kihakatapu kootou e mee na mee kootou ni ppena raa.

<sup>26</sup> Kootou e isi na tama e mannatu pera ma laatou nitama telotu? Kame akoe se hakamattonu i te vahi te maihu akoe raa, tena te mee akoe ma akoe hetama i telotu raa ku sei koi, tena akoe e mariu koi i akoe hokkoe. <sup>27</sup> Hea Te Atua Tamana e maanatu ma e matahua, ia e tauareka i te vahi telotu raa ko te mee nei: kilollohi na tamalliki se isi na maatua raa ia ma na tautukaha hline ina hakalono lihu laatou raa, tena kurorohi akoe kise haere no mmao e mee na mee sakkino i te maarama nei raa.

## 2

### *Laoi na tama hakaatoa*

<sup>1</sup> Aku taina, kootou ni hakattina ana Jisas Krai Te Ariki taatou raa, teenaa ko Te Ariki e isi na mahi haimmahira, tena kootou seme ma kootou kihihhai koi na tama e tauttari hea kootou ekkite ma nakaremata kootou raa. <sup>2</sup> Kame hetama haisileni etaaro tering ekivakiva te matarima aia, tena ki uru na hekau esuimmaha, e haere atu i te kina kootou ekkutura, tena hetama e hakaalloha euru na hekau masaessae ku haere atu hoki.

<sup>3</sup> Tena kame kootou e hakammaha te tama e uru na hekau taualleka raa, tena ki meake te tama raa ma, "Haere no noho ite kina imua raa," tena ku meake te tama hakaalloha raa ma, "Haere notuu imuri, kaa seai akoe ku noho iaruna te kiripapa ite kina na vae anau nei," <sup>4</sup> tena kootou ku ssara e mee kootou ku hirihiri i te vahi kootou hokkootou ite tokorua nei, tena ki hai koi na mannatu kootou tautari na hakataakoto kootou e sakkino raa.

<sup>5</sup> Aku taina ma aku soa lairoo, hakallono! TeAtua e hirihiri na tama e hakaalloha ite maarama nei raa ki tuttuulaoi i na hakattina laatou raa, ia kinnoho ite Hakamaatua ana Aia nitattara hakamaoniake na tama elaoi mahi Aia raa. <sup>6</sup> Emeia kootou se hakammaha na tama hakaalloha raa! Koai na tama e hai na haeo kootou, tena ki horo kootou no hakattuu imua na tama hakatonutonurua? Teenaa ko na tama hai sileni! <sup>7</sup> Na tama naa ko na tama tera nitamoahaeo teinoa tauareka TeAriki kootou raa.

<sup>8</sup> Kootou e me kippena na mee ettonu kame kootou etauttari tetuaa ite Hakamaatua ana ite Vaelani tera emmau iroto te Launiu Tapuraa ma, "Laoi alaa tama pera ma akoe elaoi akoe hokkoe." <sup>9</sup> Emeia kame kootou ehiihai koi na tama etauttari hea kootou ekkite ma nakaremata kootou raa, tena kootou e me kihaisara, tena tetuaaraa ehuriatu pera ma kootou kuseu tetuaaraa. <sup>10</sup> Kame hetama eseu hetuaa hokotahi, tena tetama naa kuhaisara ite vahi na tuaaraa hakaatoa. <sup>11</sup> Maitaname tetuaa emee ma, "Auu sekaremata kailallao," tena teeraa tuaa hoki emee ma, "Auu setaatama." Niaina ma akoe sekaremata kairarao, emeia akoe eme

ki sara ma na tuua raa hakaatoa kame akoe e taa te tama no mate. <sup>12</sup> Tattara, tena kuppna e mee kootou e me ki hakatonutonuria tetuaa tera e hakattana taatou raa. <sup>13</sup> Maitaname TeAtua selavaa te aroha tesaaita Aia e hakatonutonu te tama se isi te aroha aia raa, e meia te manava aroha raa e hakanaaniu i aruna te hakatonutonu na tama raa.

*Na hakattina ia ma hea taatou e ppena.*

<sup>14</sup> Aku taina, eisi tetauareka kame kootou e tattara ma kootou e isi na hakattina, e meia hea kootou e ppena raa settonu? Kaa na hakattina kootou raa elavaa tetokonaki kootou no ora? <sup>15</sup> Kame eisi naitaina ia ma nakaave kootou se isi na hekau ia ma na kai kikkai. <sup>16</sup> Tena eisi tetauareka kame kootou e meake na tama raa ma, "TeAtua e hakatapu kootou. Nnoholaoi nokkai hakaraoi!"? Ia eisi tetauareka kame kootou selavaa tetokonaki natamaraa ma hea laatou e hihhai iroto na ora laatou raa? <sup>17</sup> Kame te hakattina koi hokoia, tena se isi na mee taualleka e hakapaa ake ma te hakattina raa, tena te hakattina naa he hakattina koi e mate.

<sup>18</sup> Emeia e isi roo te tama e me kitattara ma, "Teeraa tama eisi te hakattina, teeraa tama e me kippena namee taualleka." Tena anau e me ki meatu ma, "Huri mai ma te tama elavaa peehee te isi te hakattina, tena kootou se hai mee e huri mai kikite anauraea. Anau e me kihuriatu namee kikkite kootou te hakattina anau." <sup>19</sup> Kootou e hakattina pera ma eisi TeAtua hokotahi koi? Tauareka! Na tipua sakkino raa e hakattina hoki, ia eporeppore te mattaku. <sup>20</sup> Kootou e vvare roo! Kame kootou e hakattina koi, tena se hai mee roo tauareka e ppena, tena te hakattina naa he hakattina

koi e mate. <sup>21</sup> Abraham tetipuna taatou raa e hakatina TeAtua, tena ki hoki ake Aisak te tama aia raa i aruna te olta. Te saaita Abraham ni penate mee e tonuraa, tena TeAtua ku hakataakoto pera ma tamaraa e tonu tahi i na karemata Aia.

<sup>22</sup> Kootou ekkite pera ma te hakatina tamaraa e hakanatahi ma namee aia eppenaraa. Tesaaite aia nippena namee ettonuraa, te hakatina aia raa ku kaatoa. <sup>23</sup> Tena na tattara te Launiu Tapuraa ehurimai no hakamaoni, "Abraham ehakattina TeAtua, tena TeAtua kutoo te maanatu ma tamaraa e tonu tahi i na karemata Aia." Tera hea Abraham ekannaria ma hesoa laoi TeAtua. <sup>24</sup> Teenaa kootou ekkite pera ma namee taualleka taatou eppenaraa ehuriake pera ma taatou kuttonu ma TeAtua, ia seai ma ko na hakattina koi taatou raa.

<sup>25</sup> Rahap e mee peeraa hoki. Niaina te hine raa e hai huri, e meia aia eppena namee ettonu hoki. Rahap e too tokorua na tama Israel e matamata hemuu raa no hakammuni i roto te hare aia raa. Ia tena te hine raa e tokonaki no hakassao tokorua raa iteeraa mateara. Tera hea te hine raa e tonu tahi i na karemata TeAtua.

<sup>26</sup> Kame te tinotama te tama ku se mamananava, tena tetama naa kumate. Ia kame hetama ehakattina, tena kitiaki teppena namee ettonuraa, tena te hakatina te tama naa e mate hoki.

### 3

#### *Lollohi hakamattonu na tattara kootou*

<sup>1</sup> Aku taina te lotu, na tama kootou e akoako raa ki setammaki. Pera ma kootou e illoa, maatou

na tama e akoako raa e me ki hakatonutonu ria eraka iaruna ma alaa tama. <sup>2</sup> Taatou hakaatoa e ppena namee essara. Emeia kame hetama sepena te mee esara inatattara aia, tena te tama naa e tonu tahi, ia e lavaa hoki te rorohi hakaraoi aia hokoia. <sup>3</sup> Taatou e ppono namee pammee iroto na maihu na hosraa kimee na hosraa kitauttari taatou, tena taatou e me kilavaa te mee na hosraa ki huro na kina taatou e hihhairaa. <sup>4</sup> Kaa seai, kootou kumannatu na vakatua hai pukei raa: niaina ma te vakatua hai pukei raa e rahi roo, emeia te matani hai mahi raa e lavaa koi te mee te vaka raa ki tere, tena te hoe paamee te vaka raa e lavaa te uru te vaka raa ki tere i te kina te ariki te vaka raa e hihai aia ki tere raa. <sup>5</sup> Essau hoki ma te arero: te arero raa e paamee, emeia te arero raa e lavaa roo te tattara ahu i na mee e llahi.

Mannatu! Te maramara paamee roo e lavaa tettuni te pupu e rahi roo ki ura. <sup>6</sup> Tena te arero raa essau pera ma he ahi. Te arero raa essau pera ma hemaarama epii na haisara etuu iroto natinotama taatou nottoha te sakkino raa iroto na ora taatou. Te arero raa e hakaura natinotama taatou raa hakaatoa ma te maramara e hamai i te kina teahi evvela tahi raa. <sup>7</sup> Taatou na tama e lavaa te hakataratara na manu, tena taatou ku oti te hakataratara alaa manu takavao, na manu kaittama, na manulelee, na moko torotoro ia ma naika. <sup>8</sup> Emeia sehaitama e lavaa te hakataratara te arero. Te arero raa e sakkino, ia selavaa te moe hemuu. Te arero raa e pii na mee sakkino. <sup>9</sup> Taatou e hakammaha Te Atua Tamana ma na arero taatou, tena na arero taatou raa e hai



hoki na haeo alaa tama, na tama tera e pena iho tautari te tipu roo TeAtua raa. <sup>10</sup> Na tattara hakammaha ia ma na tattara haeo raa e hopo iho i taha ma te maihu hokotahi naa koi. <sup>11</sup> Te vaitea laaua ma te lottai raa se lavaa te koo iho hakaatoa i taha ma te hatu hokotahi. <sup>12</sup> Aku taina, te niu selavaa te hua na natu; te kuru selavaa te hua na niu, tena te vailottai selavaa te hakatike no marie.

### *Te atamai e hamai i aruna*

<sup>13</sup> E isi na tama kootou e atamai, ia e mattonu? Tena kootou ku huri mai te hakamaoni i na ora taualleka kootou raa, na mee taualleka kootou e ppena ma te pasemmu ia ma te atamai raa. <sup>14</sup> Emeia kame na hatu manava kootou raa ekkere, e haeo roo, ia e mannako, tena auu setattara ahu ki selavaa kootou te hai ssara itevahi na tattara hakamaoni raa. <sup>15</sup> Te atamainaa se hamai i TeAtua i aruna; teenaa he atamai koi i te maarama nei. Te Anana Tapu se kou mai te atamainaa, Satan hokoia e kou mai te atamainaa. <sup>16</sup> He matakaina peehee na tama e manava kkere, ia e mannako, te kina naa selavaa tennoho tauareka, ia e me ki isi na sakkino hakaatoa. <sup>17</sup> Emeia te atamai nei e hamai i TeAtua i aruna. Te mee kaamata roo ite atamai nei ko te matahua, te noholaoi, te pasemmu ia ma telaoi. Te atamai nei e pii te manava aroha, ia e huri mai na tiputipu taualleka. Te atamai nei se isi na tiputipu sakkino ia ma ki tattara uhiuhi. <sup>18</sup> Tena te tauareka raa ko te tiputipu ni hura ake i roto te tiputipu te noholaoi raa ina hehekau na tama e haere hakatonutonu na sara raa.

## 4

### *Na tiputipu sakkino i te maarama nei*

<sup>1</sup> Na hakatauttau ia ma na puppuhu kootou naa e oo mai i hee? Na mee naa e oo mai i te hihhai kootou na mee taualleka tera emmoe tahi i roto na hatu manava kootou raa. <sup>2</sup> Kootou e hihhai na mee, e meia kootou selavaa tetoo na meeraa, tena kootou ku mannatu ma kitaa na tama ki mmate; te hihhai kootou na meeraa erahi roo, e meia kootou selavaa tetoo na meeraa, tena kootou ku hakatauttau no puppuhu. Kootou se isi na mee kootou e hihhai, maitaname kootou se kainno ake TeAtua ki kou atu na mee raa. <sup>3</sup> Ia te saaita akoe e kainno raa, akoe selavaa tetoo na mee raa, maitaname te tiputipu akoe e kainno ake raa e sara; akoe e kainno i na mee akoe e hihai koi ki hihia akoe ma na mee raa. <sup>4</sup> Kootou ni tama se isi na hakattina! Kootou se illoa ma te hihhai kootou na mee i te maarama nei raa e me ki mee kootou ki nonnoho haeo ma TeAtua? Kame akoe e hihai ki soa laoi ma te maarama nei, tena akoe e me ki mee akoe ki nonnoho haeo ma TeAtua. <sup>5</sup> Auu se mamannatu tammaki i na tattara taatou e paupau i roto te Launiu Tapu raa:

“TeAtua e rorohi hakamaoniroo te anana Aia e tuku i roto taatou raa.”

<sup>6</sup> Emeia te tauareka TeAtua e kou mai raa e rahi roo. Pera ma te Launiu Tapu raa e tattara ma,

“TeAtua se hihai na tama e ahu, e meia Aia e kou ake te tauareka i na tama e pasemmu raa.”

<sup>7</sup> Ia tena kootou hokkootou ki hakallono TeAtua. Ui itaha ma Satan, tena aia e me ki haere itaha ma kootou. <sup>8</sup> Oo mai ki tappiri kootou i TeAtua,

tena Aia e me ki hamai no taapiri kootou. Kootou na tama hai ssara raa, kootou ki ssoro na rima kootou raa! Kootou na tama tattara uhiuhi raa, kootou ki verevere na hatu manava kootou raa! <sup>9</sup> Kootou ki alloha, ttani, tena ku ppari; hakatike tekkata hihhia kootou naa, tena ku tanitani, hakatike tennoho hihhia kootou naa, tena ku nnoho se hihhia. <sup>10</sup> Kootou ki pasemmu i mua TeAtua, tena Aia e me ki ssau kootou i aruna.

### *Auu se hai na haeo alaa tama*

<sup>11</sup> Aku taina, auu sevekuveku alaa tama. Kame akoe evekuveku no hai na haeo alaa tama telotu, tena akoe evekuveku koi no hai na haeo na tuaa raa. Kame akoe e hai na haeo na tuaa raa, tena akoe sei ma he tama e tautari na tuaa raa, emeia akoe hoki he tama e hai na haeo na tuaa raa. <sup>12</sup> TeAtua ko te Tama ekou mai na tuaa raa, tena ki hakatonutonu na tuaa raa. Aia Hokoia e lavaa te tokonaki, ia e lavaa te seu. Akoe e hakatettere ma akoe koai ki hai na haeo alaa tama naa?

### *Na tattara hakamattaku na tama hai ahu*

<sup>13</sup> Te saaita nei kootou ki hakallono mai anau, na tama e tattara ma, “Te aho nei, kaa sei taiao taatou ku huro i teeraa matakaina no nnoho he hetau hokotahi kissee he ara kitoo taatou tammaki na sileniraa.” <sup>14</sup> Kootou se illoa ma na ora kootou taiaoraa eme kittipu peehee! Kootou e ssau pera ma he kohu te ahi tera taatou ekkite paa saaita koi, tena se roroa ku haere no sei raa koi. <sup>15</sup> Kootou e tau te tattara peenei avare: “Kame TeAtua e hihai, taatou eme ki nnoho no ppena te mee nei, kaa sei ku ppena te mee raa.” <sup>16</sup> Emeia te saaita nei kootou ku ahu,

ia kootou ku tattara ahuahu; na tattara ahuahu peenei raa e ssara.

<sup>17</sup> Ia tena taatou e me kissara kame taatou se ppena na mee taualleka taatou e illoa ma taatou e tau te ppena raa.

## 5

### *Na tama hai sileni raa ki hakamattonu*

<sup>1</sup> Tena te saaita nei, kootou na tama hai sileni raa ki hakallono mai anau! Kootou ki tanittani hakamaroa i na tapahara koi oo atu kootou raa. <sup>2</sup> Na sileni kootou raa ku ppara,

tena na hekau kootou raa ku kaina ria na lollona.

<sup>3</sup> Na gol ia ma na siliva kootou raa ku piritia, tena kootou e kkite te piritia nei e me ki huri atu no kai na tinotama kootou raa pera ma he ahi. Kootou e hakatautau na sileni ia ma na hekau kootou raa i na aho hakaotiotei nei. <sup>4</sup> Kootou se kou ake na sui na tama e hehekau i roto na paupaku kootou raa. Hakallono na tamumu na tama raa! Nattani na tama e hehekau i roto na paupaku kootou raa ku ttae i TeAtua TeAriki Hai mahi raa.

<sup>5</sup> Na ora kootou i te maarama nei raa e pii roo na mee sakkino ia ma na hihhia. Kootou e mee na tinotama kootou raa no llahi ki tanattana te aho te haeo raa. <sup>6</sup> Kootou e kou ake na haeo na tama, ia etaa na tama no mmate, tena na tama raa se huri atu no ppuhu ma kootou.

<sup>7</sup> Aku taina telotu, nnoho hakavaratoa ki ttae te saaita TeAriki e hamai raa. Kira ake, na tama e ttori na kai raa e varatoa roo te nnoho no ttari te saaita na kai laatou e ttori raa e hhua na hua. Na tama raa e varatoa roo te ttari ki tae mai te saaita telaa ia ma na reurehu. <sup>8</sup> Kootou

### *Nnoho hakavaratoa*

<sup>7</sup> Aku taina telotu, nnoho hakavaratoa ki ttae te saaita TeAriki e hamai raa. Kira ake, na tama e ttori na kai raa e varatoa roo te nnoho no ttari te saaita na kai laatou e ttori raa e hhua na hua. Na tama raa e varatoa roo te ttari ki tae mai te saaita telaa ia ma na reurehu. <sup>8</sup> Kootou

hoki ki varatoa. Kootou ki mannatu hai mmahi, maitaname te aho TeAriki e me ki hamairaa ku taapiri.

<sup>9</sup> Aku taina, kootou ki setamumu i alaa tama kiselavaa TeAtua te hakatonutonu kootou. Te Tama hakatonutonu raa ku taapiri ki hamai, ia ku tanattana ki hakahura mai. <sup>10</sup> Aku taina, mannatu na profet TeAtua e tattara ite inoa TeAriki raa. Too na tama raa pera ma nitattara hai auna tera e varatoa tennoho ma na hakalonollihu. <sup>11</sup> Taatou kukanna ma na tama raa ku hakatapurua, maitaname laatou ettuummau. Kootou ellono te varatoa Jop, tena kootou e illoa ehia namee TeAtua nikouake tamaraa ite hakaotioti. E mee TeAtua e isi roo te aroha ia ma telaoi.

<sup>12</sup> Aku taina, te meeroo e hakamaaturaa, auu se kouake te hakamaoniroo kootou te saaita kootou e hihhai ki hakamoe hetattara hakamaoni. Auu setapa te vaelani, te maarama nei ia ma alaa mee hoki. Tapa koi peeraa, “Noo” te saaita kootou e mannatu kimee ma noo, tena tapa koi “Seai” te saaita kootou e mannatu ma kimee ma seai, tena kootou e me kiselavaa tennoho iraro na mahi TeAtua ki hakatonutonu raa.

### *Hakattina te lotu*

<sup>13</sup> Eaa, eisi natama iroto kootou e hakalonollihu? Natama naa etau telotu. Eisi natama kootou e hihhia? Natama naa etau te huhua na rue ki hakammahaake TeAtua. <sup>14</sup> Eisi natama kootou elavvea? Na tama naa etau te meake na tama hakamattua telotura kiooake nolotu ma laatou, tena ku amuhi natama naa ma telloo hakatapura ite inoa TeAriki. <sup>15</sup> Na hakattina

na tama e too teloturaa e me kimee tetama laavea raa ki tauareka; TeAriki e me ki tokonaki tetama naa ki maatara muri, tena TeAriki e me ki ssirihia na haisara tetama naa. <sup>16</sup> Ia tena, kootou ki uiake na haisara kootouraa ialaa hakattina ana, tena kulotuake hoki TeAtua ma alaa hakattina ana, tena TeAtua e me ki tokonaki kootou ki taualleka muri. Na lotu na tama e taualleka raa e ivi, ia e hai mmahi roo.

<sup>17</sup> Elaija he tama hoki peenei ma taatou nei. Aia e lotu hai mahi roo ma ki se lavaa he reurehu elleku, tena se hai reurehu nilleku i roto te henua naa e toru na hetau iama e ono na marama. <sup>18</sup> Tena kioti aia kulotu hakaraoi, tena te reurehu raa ku nnini iho itaha ma te vaelani no hakamaariki na kai i te maarama nei raa.

<sup>19</sup> Aku taina, kame nitama kootou e oo nommao itaha ma te hakamaoni TeAtua raa, tena teeraa tama kukou mai hakaraoi na tama naa ki tappiri, <sup>20</sup> tena kootou ki mannatu te mee nei: tetama e hakatike tetama haisara raa itaha ma na tiputipu sakkino tetama naa, e tokonaki te anana tetama haisara naa ki se mate, tena tetama naa e me ki ssorohia no matahua itaha ma na haisara aia raa hakaatoa.

**Nukumanu**  
**The New Testament in the Nukumanu language of**  
**Papua New Guinea**  
**Nupela Testamen long tokples Nukumanu long**  
**Niugini**

copyright © 2020 Wycliffe Bible Translators, Inc.

Language: Nukumanu

Contributor: Wycliffe Bible Translators, Inc.

All rights reserved.

2023-03-22

---

PDF generated using Haiola and XeLaTeX on 21 Feb 2024 from source  
files dated 22 Mar 2023

54439682-f8e2-586d-98e1-295d02f74287